

Candelario "Booshi" Wever

Booshi Wever (54) no ta laga duda ora cu e tuma un decision cu e ta esun responsabel p'e. Como Minister di Salud Publico, Medio-ambiente y asunto administrativo, e tin un estilo cu ta causa admiracion pa su curashi y rabia serca esnan cu su decisionnan ta afecta. E no ta ria pa tuma un decision hasta si e por cost'e politicamente. Pa nos conoce mas di ken Booshi Wever ta como persona y kico a forma su caracter y asina compronde su decisionnan, tabata motibo pa nos bishita e mandatario controversial



MI TA PREFERA DI MURI POLITICAMENTE PERO LAGA AZV KEDA NA BIDA

El a nace 6 di february 1954, practicamente el a nace hunto cu nos carnaval cu tambe tin e mesun cantidad di aña di existencia. No tur hende conoce e Booshi Wever priva, esta esun cu gusta conta joke, mayoria di nos conoce e Booshi publico, un persona di decisionnan duro ora ta necesario. Su contrincantenan politico conoce como un politico provocador cu mayoria biaha ta cana cu su curazon riba su schouder, esta bo sa precisamente kico su pensamentonan ta p'abo como politico.

"Mi Mama a muri tempo mi tabatin

apenas 7 aña, mi a crece hopi mima, casi semper mi tabata haya mi kier. Mi Tata mester a kita for di trabou na Lago pa asina cria nos tur, e tabata esun cu mas a influenciarni. E tabata un hende tranquilo, hopi cristian y despues cu el a muri, nan a bin haya sa cuanto hende e tabata yuda den su bida". Esun di mas chikito di 10 ruman, e ta bisa cu el a drenta politica, pasobra a cri'e cu e 'paplepel' politico, esta cu desde e ta corda, ta casi esey so ta papia riba dje na cas. De hecho su tata a lanta su propio partido Frente Obrero Arubano FOA, prome cu el a join MEP.

"Nos tata a siña nos cu, bo ta para pa loke bo ta kere den dje y esey a keda graba den mi curazon". Despues di school na San Nicolas, el a bay studia na Hulanda, na unda e tabata sigui e desaroyonan di e prome simiñanan pa Status Aparte, sembra door di Betico Croes (QEPD).

"Aki tabata un turning point mas grandi den mi bida. Door di cu mi a custuma cu tur cos ta yega facil n'ami, mi a kere cu mi por haci wega cu un asunto serio manera un diploma. Si nan no a catch mi, lo mi no a siña e les di mas valioso den mi bida. E tabata un golpi

E PENSIOENADO CU TA COBRA SOLAMENTE PENSIOEN DI BIEHEZ NO TA PAGA NADA NA AZV

duro p'ami y mi famia, pero cu esey mi a siña cu den bida, bo tin cu traha duro pa loke bo kier logra." Candelario "Booshi" Wever a bira serio cu esaki y ta conta nos cu el a bira determina pa logra su estudio di berdad. El a gradua despues di a studia como docterandus di derecho internacional y derecho estatal.

Ela haya trabou como secretaris di 'Constitutionele zaken' y a pensa di hiba un bida keto. Varios persona a aserk'e pa e drenta politica, pero e no tabat kier pa e episodio di e 'diploma' bira conoci. Te dia cu Betico Croes mes, a bin su cas pa convenc'e. **"El a ponemi mira cu apesar cu un hende por a comete un eror den pasado, si el a paga pa su eror, siña su les y logra supera su mes, e tin tur derecho di postula su mes pa un puesto publico y asina a sosode"**. E ta bisa di por a scohe pa keda den anonimato y niun hende lo no a haya sa di e episodio ey, pero no el a scohe pa politica cu tur su riesgonan. Inicialmente e tabata molestia ora cu contrincantenan politico bin cu e cuestion di diploma, pero awor el a ripara algo cu ta hacie contento **"Ora oposicion of corantnan bin cu cos personal, ta pasobra, nan no tin nada riba mi 'trabou', nan no tin argumento, nan sa cu mi ta haci lo corecto. E ora ey nan ta bin pa ofende cu e 'diploma', e hotel, bar di prostituta y Dios sa ki' mas nan lo pensa cu mi ta doño di dje. Lo no strañami cu aki un paar di dia corant bisa cu mi ta doño di un refinaria tambe na Venezuela. Mayoría biaha no ta bal'apena pa ni reaccion."** E ta kere cu pueblo sa distingui e atakenan. E ta menciona cu den e ultimo eleccion el a bay di menos cu 800 voto pa mas cu 1300, e ta interpreta esey como confianza di pueblo den su trabou.

Nos ta enfoca riba su cartera di mas grandi y cu mas discusion cu ta Salud Publico. E Minister ta splica cu na aña '89 nan tabata den gobierno y a traha riba e introduccion di un aseguro medico general, e idea a contra cu hopi resistencia politico. **"E tempo ey ya tabata bisto cu e prima mester ta rond di 13%, cu mester bin hopi mecanismo di control, pa hende no abusa di e derecho. Lastima**



cu AVP a us'e como cabay di campaña na aña 2000. A cuminsa sin e controlnan, mediconan cu tarifanan halto y cu un prima mucho abou. Ta claro cu si nos no a cuminsa haci cambio na AZV, e lo kibra!" E deficit a cuminsa bin bou control segun Minister Wever na 2005 y 2006, pero na 2007 ya e gastonan den exterior a cuminsa subi asina tanto cu a crea otro deficit. (Florin: lesa splicacion detaya di Director di AZV 'Riba e Stul') E mandatario ta ilustra cu si tuma aña 2003 como ehempel, 665 patient mester a haya tratamento den exterior cu a costa 27 miyon, e aña 2006 riba 900 patient a haya tratamento den exterior y a paga 20 miyon, cu esey e kier ilustra cu e enfasis ta riba e cuidu. **"Antes e deficit tabata bay den saco di institucionnan y no den e cuidu real. Awendia e nivel di cuidu ta mihor e placa ta bay na esey."** Nos ta puntr'e pakico no laga tur e dificultadnan aki un banda; si e no tin miedo cu politicamente AZV por cost'e, e topico aki a pone alza voz. **"Mi ta prefera di muri politicamente, pero laga AZV keda na bida, e ta bon pami y pa tur otro hende. Si esey ta nifica mi fin como politico, 'so be it', ta facil pa haci cos populista of pasobra tin eleccion haci cos cu mi sa ta bay ta malo pa e pais, a lo largo."**

Wever ta bisa cu como gobierno no por haci wega cu hende su salud, pues no por laga e placa caba. E ta menciona tin varios famia cu ta practicamente biba afo, pa motibo di complicacion diabetico, e ta bisa cu bou di un seguro, e gastonan lo no tabata pagabel pa famianan. E deficit na AZV ta di 30 miyon y e ta menciona di a spera mas seriedad di politiconan den oposicion, loke e ta sinti ta wega politico.

E kier pa pueblo compronde dicon mester a tuma medida pa yuda AZV. **"Un hende cu ta gana 2000 florin pa luna ta paga 40 florin na prima di AZV, un bishita na un huisarts y ela come e placa ey; dos remede y ela sigui come den e placa y si e bay specialista ela caba di come. Corda cu pa e 40 florin ey, e su casa y su yiunan ta cubri practicamente sin limite. Pens'e un rato, si nos ta**

paga suficiente? E ta conta p'ami tambe como minister, si nos no ta paga mucho tiki, ta discusionnan cu nos tin cu hiba." Ta e discusionnan aki e kier hiba cu politiconan den parlamento. Ideanan mane' 'eigen bijdrage' ta puntonan cu e kier brainstorm. Tambe e ta menciona e hendenan cu a sabiendas cu nan ta come malo y ta haci daño na nan salud, con por stimulan pa mehora nan salud, pa pone nan move.

Un topico cu ta sali hopi den prensa ta nos pensionadonan y nan contribucion na AZV, nan ta sinti cu nan ta paga di mas, e Minister ta pensa otro. **"E pensioenado cu ta cobra solamente pensioen di biehez, no ta paga nada na AZV! Gobierno ta pag'e pa nan. Esnan cu ta grita mas duro tin un pensioen apart. Dus nunca nan ta paga e 'volle pond', dus average nan ta paga ta un 5 pa 6%."** Hopi di esnan cu a bay e manifestacion di poco dia ey, ta secretarianan di propio ministernan cu a introduci e ley di AZV, sin control y cu un systema casi 'free for all', e tempo ey mi no a mira nan subi caya." Booshi Wever ta papia di e unico idea cu el a scucha di oposicion ta pa crea un seguro cu menos beneficio pa e inmigrante. E ta pensa cu ta hustamente hendenan aki, cu a pasa tur sorto di test di salud ta e bon cliente di AZV. **"Ta hustamente e hendenan aki ta bisa cu ami ta contra inmigrante; ta nan kier considera stranhero legal como menos"**. Nos ta probecha pa haci pregunta tocante e pakico Hulanda a pone e departamento cu a bira DIMAS bou di su encargo, si esaki no tabata un muestra di desconfianza den e Minister di Husticia. **"No, corda cu e intencion di e Minister di Husticia mes na 2005, a anuncia cu e no kier a sigui cu e departamento y ta e mester a bay di acuerdo pa e departamento aki keda restructura. E papelnan mester a cana bay bin demasiado biaha entre departamento y tabata tarda demasiado. Pues pa eficiencia tabata logico y necesario pa moderniza y agiliza e proceso. Nos a haci e cambionan cu ayudo di Hulanda, pasobra pakico re-inventa e wiel."** E Minister ta bisa cu hopi ta purba dañá



su number door di bisa cu e ta contra imigrante, e ta bisa nos cu esaki absolutamente no ta asina. Pero si e ta bisa cu ta su trabou pa crea oportunidad pa nos yiunan di tera cu ta termina nan estudio.

Tocante medio-ambiente e Minister ta bisa di a cansa di tende nada mas cu critica pa su esfuerzonan pa mehora nos medio-ambiente. Ela cita e miyones cu a hinca den e planta di procesa sushi na dump y awor e ta sinti cu desperdicio no ta djis acumula mas sin solucion “Nos no por a trece mehoracion inmediato riba un tereno cu a sufri pa falta di atencion pa hopi aña, poco poco nos ta yegando si awor na un solucion duradero y sostenibel pa nos desperdicio. Asina tin un cantidad di proyecto cu nos ta bay sigui anuncia pa sigui mehora nos medio-ambiente. Nan ta papia, nos ta haci” Booshi Wever awendia ta juist gusta ora cu ‘challenge’ e politicamente.

25 pa 40 aña, no ta un tiki gordo sino obeso y esey ta un preocupacion grandi p’e. Comemento insaludabel, bebemento excesivo, humamento y falta di movicion ta fomenta problema di salud. Un cos ta bira malo, un otro cos ta provok’e.

Nos a keda riba e tema medico y ta trece riba mesa e Hospital nobo. **“Kico cu nos haci e ta bay costa placa; e expertonan tecnico di PAHO a bisa cu mester traha un nobo. Cada dia cu nos tarda pa no tuma e decision ta mas caro e proyecto ta bira. Lo mi kier mira e Hospital nobo, no p’ami, sino pa e generacionnan na caminda. E construccion lo dura casi 5 aña”.** E Minister di Salud Publico ta orguyoso di anuncia e Centro di cardiologia pa IMSAN, e centro na San Nicolas. **“Pronto nos ta cuminsa riba esaki y e ta bay tambe cu e centro diabetico. E cardiologia no ta pa henter luna, probablemente ta un**

SI ESEY TA NIFICA MI FIN COMO POLITICO ‘SO BE IT’ TA FACIL PA HACI COS POPULISTA OF PASOBRA TIN ELECCION HACI COS CU MI SA TA BAY TA MALO PA E PAIS A LO LARGO

Nos ta cambia e tema pa puntre si e tin trato medico special p’e, pa motibo di su biahenan pa Venezuela. A crea e impresion den prensa cu e no ta haci uso di nos docternan local. **“Manera tur otro hende, mi a bay mi especialista local y mi especialista a dunami carta pa mi bay afo, ami no ta medico, dus ta solamente nan por bisami si mi tin cu bay y e tratamiento cu mi a haya pa tur hende lo bo tin cu bay afo, tur hende lo haya e mesun trato. Mi no ta compronde dicon hasta cu hende su salud ta hunga politiek cune.”** E ta informanos cu su ultimo chequeo medico, a mostra cu no tin ningun cel di cancer mas den su systema.

Minister Wever sa cu tin cu hinca placa den campaña di prevencion di nos salud. E ta mira cu parti di e solucion pa e problemanan di AZV ta den nos man. E gordura di nos poblacion, su informacion ta cu 52% di nos poblacion entre

biaha pa siman e cardiologonan di afo, ta join hunto cu esnan local. Resto di tempo e ta funciona como un centro policlinico.” Otro combersacionnan cu e ta hibando ta cu tres ciruhano di cirugia plastico. Den April e 3 ciruhanonan aki ta bin Aruba ta formalisa nan plan pa bin haci operacionnan, pa nan propio clientela di afo. Patientnan cu nan ta trece pasobra aki ta un lugar turistico y pa e patientnan ta dificil biaha pa Argentina, for di unda nan ta bin.

E aña aki Booshi Wever ta cumpli 25 aña den politica y mirando su salud cu e tin cu cuida, y su edad, tin ora e idea ta pasa den su mente pa retira di politica. **“Tin ora mi ta cansa mi culpa di mas y mi presion ta subi. Mi tambe mester cuida mi salud, pero mi entusiasmo pa mehora e estructura medico cu nos tin, ta lagami sigui lanta tur dia cu energia.”** E unico decision e ta bisa nos cu el a tuma pa awor ta pa sigui traha duro. 